

34-5-4-30

364

D E

PERIPNEUMONIA

IN VOMICAM VERSA

AB HORATIO BELLINI ASTENSI

TAURINENSIS ACADEMIÆ DOCTORE

*FELICITER CURATA*

DISSERTATIO

HISTORICO - MEDICO - PRACTICA  
EPISTOLARIS

AD PHILIATRUM NERVUM



R O M Æ 1775.



Typis Archangeli Cafalletti ad S. Eustachium.

*SUPERIORUM PERMISSU.*

---

Ο μὲν ἹΠΠΟΚΡΑΤΗΣ συμπάντων ἢ μὲν τῶν  
ἀρίστων μαθημάτων ἡγεμὼν .

Galen. lib. 3. de Crisib.

---



Ippocraticæ doctrinæ constantiam , & veritatem nulla unquam ætate deleri viginti circiter sæculorum firmas observationes a Celeberrimis Viris passim institutas demonstrare eamque

summos Præceptores Sydhenam , Baglivi , Boerhaave , Swieten , de Haen aliosque nostris hisce temporibus magno artis incremento confirmasse , eorum monumenta leviter etiam versanti latissime patebit . Licet autem Divini Senis in Medicina præstantia ex omnibus ejusdem Operibus eluceat , mira tamen ejus Sapientia , & ingenii vis ex Epidem: Prognostico: , Prorrheticor: , Coacar: Præfagit: , & Aphorismor: libris adeo effulget , ut Græcia , quos Herculi propter ejus merita contulit honores , ob id Hippocrati summo jure divinos publice decreverit . Nescio tamen quo artis fato contingat ut tanti Viri Oracula a quibusdam Medicinæ cultoribus nostris hisce diebus , aut parvi habeantur , aut omnino negligantur . Re enim vera cum prima Medicæ Praxeos exordia diuturnæ , laboriosissimæque Veterum observationi debeantur , morusque naturæ , & conamina ad ægri salutem eadem semper fuerint , tutiorem nullam ,

certioremque investigandorum , curandorumque Morborum Medico superesse viam , quam eorum inhærere vestigiis , una Summorum in Arte Virorum vox est , & opinio . Magni Viri præcepta , quæ apud saniores sunt totidem leges , & canones , nulla in affectione animo advertenti , magis si ma , & utilia , quam in morbis pectoris esse , Epidemica hujuscæ Anni Constitutio , opportunissimum mihi hac de re judicandi præstitit argumentum . Nitidissimum Observationis exemplar , utpote ab Hippocratico fonte plane deductum tibi præ cæteris Philiatre ornatissime , ideo imitandum proponam , quod , & novum videbitur , eritque forsan medicinam facienti summæ utilitatis . Injuriam tibi sane maximam inferrem , si Vulgarium Morborum hac ipsa Constitutione grassantium historiam tradere vellem , quum persuasum satis habeam , te , ex Nostreis Romæ , & Neapolitanis , aliorumque Regionum Medicis , si literaria Commercium tenes , intelligere potuisse . Me tamen gratissimum tibi facturum post hæc omnia putavi , si Aphorismorum Hippoc. Section. 3. , ejusdemque præsertim Aphor. 23. , & Caput 1. Dissertat. Celeberrimi Huxami de Pleuritide , & Peripneumonia attente legendum consulerem , dum ipse quæ potero , perspicuitate , fidem datam persolvo .

IMPRIMATUR,


Si videbitur Reverendissimo Patri Sacri Palatii Apostolici Magistro.

*Franciscus Antonius Marcucci ab I. C.  
Episc. Montis Alti Vicefg.*




IMPRIMATUR,

*Fr. Thomas Augustinus Ricchini Ord. Præd.  
Sac. Pal. Apostolici Magister.*

  
**S**entio autem nostræ artis incrementum in his consistere , ut habeatur primo Historia Morborum , seu descriptio quoad fieri potest graphica , & naturalis ; secundo Praxis seu Methodus circa eandem stabilis , ac consummata .

Thomas Sydhenam in Præfat. p. 8.





*HISTORIA MORBI, CURATIONIS, ET EXITUS.*



IUS, probusque Sacerdos quinquagesimum quintum circiter ætatis annum agens, temperamenti sanguineo-pituitosi, coloris terreo-flavescentis, corporis quodammodo obæsi, ad Quirinalis radices prope Sanctæ Crucis

Lucensium ædem decumbebat; is circa vesperam diei nonæ Februarii Anni 1775. summo correptus horrore sic plures traduxit horas, donec illum febrilis calor excepit, & ita affectum ad diem undecimam tenuit usqueodum mane ad illum accessor: Omnia animo lustrò, os rubro colore suffusum lingua alba oductam pituita, difficilem parumper spiritum video. Manu carpum prehendo duriusculum tactu pulsus, non valde magnum calorem exploro; sinistrumque hypocondrium ad ventriculi regionem subter costas præter-naturam tumidum percipio: Lotium intense rubet; nulla sitis; tussis parva, nullus capitis, & pectoris dolor, frequens solummodo viscidæ spumosæ salivæ excreatus, ægerrimus in latus utrumque decubitus. Venam extemplo ad uncias xiv. incidi jubeo, exquisitè tenuem victum, ptisanam nitro saturatam pro potu Ordinario tepide sumendam præscribo: Sub vesperam pallidior est facies, faciliior aliquanto spiritus, remissior pulsus, cætera eadem; sanguis veroeductus nullum corii signum exhibet, sed summe viscidus, & niger apparet, paucoque innatat flavo viscidissimo sero; Electuarium Lenitivum ad diem crastinum \* statuo, ex quo binas nigri coloris, easque copiosas ha-

*Dies*  
*Morb. Febr.*

- |    |   |     |
|----|---|-----|
| 1. | * | 9.  |
| 2. | * | 10. |
| 3. | * | 11. |

4. \* 12.

ha-

*Dies*  
*Morb. Febr.*  
 5. \* 13.

hæbuit alvi delectiones; parum inter hæc æger levatur; verum labente die angustior fit spiritus augetur febris, & tussis, noxque inquieta paratur; aësum summo mane, \* relata colligo, non multum imminuta symptomata video, rubentes adhuc genas inspicio, pulsus heri duriores observo, venam iterum ad unc. xii. tundo, ptisanæ frequentem usum suadeo, Eclegma de Oximelle simplici & syrupo de althea ex cochleari sumendum paro, sedulusque interea quid vesper vehat expecto; verum nil boni tulisse pulsusque in eodem statu advertens, & sanguinem, ac primoeducti ejusdem indolis esse, tertio venam ad uncias xii. incido; exurgit de nocte pungens dolor quintam inter & sextam lateris sinistri costam sternum versus spiritum intercipiens, molestissimam tussim excitans, externique tactus impatiens. Nova hæc epiphænomena, flammeus jugiter urinæ color, venam iterum ad uncias xii. subsequenti die \* aperiri suadent; fons affecto lateri præscriptis addo, eductum sanguinem coriacea obtectum crusta, copiosiori circumdatum sero hora vespertina invenio, viscida, copiosa, alba, spumosa saliva materiem excreatus efficit; Linguae status idem ac sub initio manet, labia pallidissimo tinguntur colore, ventris elatio imminuta paulisper est, depressi sunt pulsus, non multus est corporis calor, licet pectus, collum & caput sudore madescant. Enema commune imponatur curo, Epispastica coxis applicanda ad crastinum \* jubeo; Laboriosam efficit noctem lancinans lateris dolor, qui ad posteriora scapulam versus extenditur: mane pulsus vibrat paulisper, symptomata omnia perseverant, alvi egestio a clysmate copiosissima est; mittitur iterum sanguis ad unc. viii. \* præscripta vesicantia admoventur, parvi boli e nitro & camphora per diem parantur, cæteris interim non neglectis auxiliis: doloris vespere perseverantis molestiam paregorico lenire studeo, anxiusque quid ferat nova dies \* expecto. Verum delirium, & sine quiete transactam noctem refferunt adstantes, auctus est dolor, vividiores aliquanto sunt pulsus, pere-

\* Summa sanguinis educti sunt 58. circiter uncia.

8. \* 16.



perexiguus est qui a circumcisis vessicantibus plorat flavescens humor: mens erat latum affecto lateri imponere epispasticum, alieno ductus consilio renuit æger, fatus, mellitæ calidæ potiones, tepens aqua limonum succo diluta, syrupus de althea pauco oximelle scillitico sociatus una sunt quæ modo adhibentur auxilia; sponte solvitur circa vesperam alvus, copiosa, viscida, spumosa flavonigrescens, fætidissima est egesta materies; Levatur post hæc parumper ægotans, idque mihi ad novum clyisma statim, & Lenitivum ad crastinum addit animos. Rem mane \* exploraturus accedo, vas copiosissima ejus indolis ac præcedentis refertum materia offerunt, remissa aliquanto sunt symptomata omnia, excreatu illo salivæ excepto, qui copiosius, & viscidius est, & exiguas sanguinis strias intermixtas refert, vessicantium ulcus copioso viscido ferro madet, palletque: Remediorum præscriptorum frequentiore usum inculco, & ubi feriantur fatus vervecinum rete lateri laboranti admoveatur impono. Sero ad ægrum venio pluribus erectum pulvinaribus dorsum invenio, licet respiratio non multum difficilis appareat, pulsus eisdem serveat motus, tussis laborem facit, urina rubicunda perseverat ponderosissima, spumosa, & eneoremate pallido levius ditior, & copiosior est, sputum tenacius, & demptis strijs cæteras tenet dictas proprietates. Nil mihi suppetunt indicationes novi, omnia repeto, paregoricum adjungo, animoque contrahæto discedo. Nova sequenti luce \* ad eum sollicitus revertor, & decumbentem, ut heri, in dorsum observo, pectus, jugula, caput adhuc nocturno sudore disfluentia conspicio, matula ejusdem indolis urinæ, non adeo tamen rufæ magnam copiam exhibet, maxima est in vase jam dictæ ejusdem naturæ sputorum collecta congeries, eundem stillant vessicantia humorem, latiores, mollioresque sunt arteriarum pulsus, imminutus paulullum affecti lateris dolor, vexat eodem modo tussis, maxima pars animæ abdominalium muscutorum ope attrahitur, lingua, ut antea semper fuit, alba humida-

B

que

*Dies*  
*Morb. Febr.*  
9. \* 17.

10. \* 18.

que conspicitur, leves in imo ventre borborigmi ansam novo clysmati præbent & tussis hypnoticum suadet; spem inter, & metum ad vesperam usque sic ægrotantem relinquo; sub noctem eundem ferme servant symptomata modum, alvi dejectio ab enemate magnam cinereo-flavæ & mucosæ materiæ copiam profert consueta præsidia repeto, & naturæ molimina expectans discedo.

*Dies*

*Morb. Febr.*

11. \* 19.

Morbi dies undecima \* nil adfert novi, non multum transacta nocte quievit, cumque tussis consueta vexavit, sudor eisdem artus occupat, turbidum, copiosum, spumofum, & grave satis, at pallidius est lotium, expuitionis indoles, & natura eadem servatur, pulsus frequens, parvus, & mollis, est & in dorsum decubitus, eademque tussis. Enema ad vesperam imponitur, alvi dejectionem aliis simillimam gignit; augetur aliquanto sub noctem calor, & arteriarum pulsus, tamen dormitat, sudatque. Idem ferme est

12. \* 20.

mane \* sequenti status, circa meridiem mitescit calor, & sudor, copiosa ejusdem naturæ est urinæ, & sputio, supinus decubitus, molesta tussis, brevis, & frequens respiratio, bonamque partem abdominales muscoli peragunt, remissus est lateris dolor, sed pondus locum occupat.

13. \* 21.

Eadem symptomata die decimatertia \* cernuntur, iisdemque propterea occurritur auxiliis, & ad nimium pulmonis motum compescendum, piluli: e cynoglossi: superadduntur: solvitur sponte sub vesperam alvus, materiem cinereo-flavam, viscidam, spumofam, gravissime olentem

14. \* 22.

egerit, urinæ sunt ejusdem naturæ, falsum sapiunt sputa, nox est præcedenti similis. Nec diversa est subsequens decimaquarta dies, \* imminutus quidem est, sed constans nocturnus sudor, non dissimiles fluunt urinæ, sputa falsa screantur, nullus rei nullius, est appetitus, sitis oritur, parvus, frequens, anhelus est spiritus, subrauca vox fit, labia, genæ, corpusque pallefcunt. Descriptam modo

*Morb. Mart.*

37. \* 18.

faciem eandem ferme ad trigesimamseptimam diem \* tenet morbus, qui, licet futuræ suppurationis aliqua jam nunc signa præseferat, vagis tamen horripillationibus, dolo-

doloris remissione, gravitate lateris, corporis emaciatione, dulci sputorum puriformium sapore, nocturna, & a cibo quamvis tenui, febris exacerbatione, pulsu molli & debili, urinarum denique spumosa, pingujuscula, copiosa excretionem, magis deinceps confirmatur; unde parva peruviani corticis dosis quæ in exortu dictorum modo symptomatum, ut antypyretica proponebatur, antiseptici, & tonici vice una cum aliis auxiliis profecuta fuit, & prout indicatio postulabat blanda Eccoprotica, vel Clysmata præscripta sunt. Ea est temporis hujus decursu per alvum, ureteres, spiracula cutis egestæ materiæ copia, ut morbum sic tolli posse facile quisque putasset, nisi frequentiore hujus solutionem a sputis, eorumque indole expectandam esse, Hippocratica observata docerent: Neque fallor; post varios enim & anomalos febriculares recursum sicca semper tussu nocturno præsertim tempore comitatos xv. Kal. Aprilis hora nona matutina, morbi trigésimamseptima, dum tepentem aquam succo limonum saturatam ingerit, valida correptus tussu, quæ varios vomendi conatus excitans, Vomicam in imo sinistri pulmonis lobo latitantem magno discrimine rumpit. \* Refugit \* *Morbi Exitus.* adhuc animus successionis hujusmodi tantum meminisse, quem exitum novus hic gravissimus morbus habiturus esset ignorans. Verum naturæ providentiam in ipsa eruptione jam expertus, opem ejusdem in debita sputorum crisi haud mihi defuturam confidens, morbi prognosim in eorundem observatione sitam esse certo sciens, me totum huic evacuationi promovendæ, & contemplandæ addixi, & prout mihi res cessit verbis fideliter prosequar.

Sputa ergo primo nisu magna copia rejecta, alba, viscida, striata, subrotunda, insipida, inodora sunt, tenacique saliva non pauca miscentur, turbida, spumosa, subpallida est, quæ mingitur, urina, sparsamque tenet albam hypostasim, non dimittit ægrum febricula, anorexia, sitisque, minor est ad jugula sudor, pectus tamen occupat, ægerrimus est ad latera situs, facilius aliquanto

- spiritus, usu clysterum excepto; eadem ipsa sunt quæ in primi morbi stadio adhibebantur auxilia; victus e Cereali-  
*Dies* bus aqua multa dilutis paratur, & interim in diem po-  
*Mor. Vom. Mar* sterum observationes deferuntur. Inchoat æger tussiendo,  
 38. \* 2. \* 19. & expuendo diem \*, excreta ejusdem indolis sunt, & copiar, easdem possidet lotium proprietates, durat adhuc febricula, non multus est corporis calor, non arida cutis, crescit a prandio tussis, sputa multa simillima primis per diem screantur, spiritus difficultas decrescit, pondus valida in inspiratione sinistrum latus occupat, jugis est in dorsum decubitus, alvus sponte fluit, exigua, compactaque dejicit: Nocte parumper quiescit, sed posteriori simili-  
 39. \* 3. \* 20. lis Aurora \* resurgit; sputorum ejecta congeries præcedentem excedit, qualitas non recedit ab illa, turbida, spumosaque minus urina, simili modo pectus sudore madescit, pulsus eisdem servat rhitmos, imminuta est paululum sitis, vox usque ad hoc tempus subrauca clarescit, incalescit post prandium, tussitque paulisper, parum est quod tota hac die per sputa rejicitur. Animo diluendi, acremque materiam demulcendi serum lactis Caprilli cicoreo alterati ad uncias octo mane sumendum præscribo.  
 40. \* 4. \* 21. Nox a descripta parum admodum differt, sub diem \* tussis vomendi conatus excitat, maximamque sputorum copiam naturæ primorum promovet; matula clariorem præbet urinam, eneoremate pallido fundum ejus occupante divitem, magis, magisque facilis fit spiritus, extinguatur sensim, sensimque sitis, dulcia sputa nonnulla albo-flavescentia pectore ab imo in diem educuntur, tussis, & sudor recurrit, pauca iterum, & densa venter spote deponit. Flavio-  
 41. \* 5. \* 22. ra sunt mane \* sequenti projecta magna copia sputa, quæ nox cæteris magis quieta paravit, easdem tenet urina dotes, febris vix percipitur, perexiguus est calor, pectus sudore madet, facilius ducitur spiritus, vi sputa nonnulla ab ima pulmonis parte trahuntur, eaque dulcia, viscida, aliisque flaviora; est mitis admodum tussis,  
 42. \* 6. \* 23. sitisque, Morbi systema per binos dies \* idem servatur,  
 43. \* 7. \* 24. Septi-

Septima a rupta vomica die hora matutina ita recrudescit  
tussis, ut maximos excitet vomendi nifus, quos inter tanta  
sputorum copia rejicitur, ut nulla usque adhuc similis visa  
sit, eaque levia, alba, aqualia sunt, nonnullaque fla-  
va intermixta densiora tenent. Minor est a prandio tussis  
calorque, arteriarum pulsus vix a naturali statu recedit,  
sudat adhuc pectus, ad citrinum colorem tendit lotium  
quod albam hypostasin pyramidalis quasi figuræ in matulæ  
fundo deponit, alvus exigua figurata, ut præteritis diebus,  
hac etiam sponte egerit. Præscripta hæcenus remedia, li-  
cet in ejus generis morbo valde conferre observarim, va-  
lidiora tamen pulmonesque proximius respicientia indica-  
tio requirere videbatur; ad temperantia proinde demul-  
centia, mundificantia, abstergentia, expectorantia, an-  
tiseptica, tonica animum converti, parvosque bolos ex  
terebinthina, olibano, myrrha, balsamo Peruviano,  
paucaque balsamo sulphuris dosi sociatis paravi, \* & ne 44. \* 8. \* 25.  
quid optandum superesset, vires rescindi, & humectan-  
di causa Lac Asininum ad uncias octo mane sumendum  
præscripsi, victumque e frumentaceis simplicissimo juscu-  
lo, aut lacte incoctis bis in diem paravi, quibus deinceps  
etiam olera adjunxi, vociferationem; omnesque vehemen-  
tiores animi motus, iramque præsertim perniciosissimam  
esse ægrotanti significavi, compescendaque jussi. Annuit  
votis eventus; sensim enim sensimque \* humorum pulmo- \* Spatio nem-  
nes obsidentium concoctio perficitur, sputa fluvidiora, pe Mens. unius.  
faciliora, copiosioraque fiunt, colorem subflavum acqui-  
runt, levia, aqualiaque sunt, pondus lateris minuitur,  
spiritusque facillimus reditur, urinæ copia jugiter quoque  
crescit, coloremque subflavum adipiscitur, & sedimen-  
tum album levem, & æqualem in matulæ fundo deponit.  
Critica hæc morbificæ materiæ excretio per gradus ad 64. \* 38. \* 25.  
diem ferme trigessimam octavam \* a rupta vomica maximo  
symptomatum levamine, & ægrotantis emolumento quo-  
tidie crescit: deficit enim nocturnus sudor, facilis fit in  
latus utrumque decubitus, facillima respiratio, redit ap-  
peti-

Dies

Mor. Vom. Apr.

64. \* 38. \* 25.

*Dies*  
*Mor. Vom. Maj*  
*71. \* 45. \* 1.*

petitus, & fomnus, exurgunt vires, functiones, verbo, naturalem statum omnes acquirunt; incipiunt hinc sputa defici, & ita porro minuntur, ut circa quadragesimam quintam \* secundi hujusce morbi diem exsiccati ulceris manifestissima signa videantur, nihilque aliud restet, quam Eulichimis alimentis juxta diæteticas regulas ingestis, pristinas ægroto vires, restituere, & gravissimi morbi, rusticorum aerem, motumque pro viribus consulendo, curationi fœgium imponere.

Curiosius quam par est morbi hujus historiam exarasse tibi fortasse videbor quum lævia quæque festarim, & ad nauseam usque repetierim. Verum numquam satis graphice delineatam hanc esse putavi quum te alloqui statuissem; imo ne quid tibi deficeret practicas observationes quasdam ad morbi naturam, diagnosim curationemque spectantes huic subnectere opportunissimum duxi.



PRA-

# P R A C T I C Æ

## A N I M A D V E R S I O N E S .

### §. 1.

**M**Ixta quæ in hoc morbo observantur phænomena , non ita facile speciem ejusdem deffinire permittunt ; alia enim ad veram , nonnulla ad notham Peripnevmoniam referri posse , hiftoriam sedulo percurrenti facillime patet . Quoniam vero varii gradus illam inter , & istam occurrunt qui affectionem hanc ad magis , vel minus inflammatorium determinant , multiplicem quoque medendi methodum requirere videbantur .

### §. 2.

Duas prima morbi facies indicationes offerebat , symptomata nonnulla Phlebotomiam , alia Catharsin postulabant ; inflammationis timor illam extemplo , hanc cacochilia signa petebant : urgentiori venam tundendo satisfit , tenui deinde diluenti , refrigeranti demulcenti , blande attenanti potu alteri indicationi via molitur , cuique postmodum eo libentius occurritur , quod phænomena inflammationem minitantiâ remiserint .

### §. 3.

Diligentissimi Sydhenamii observatio , quæ evincitur corpora habitu crassiori prædita , floremque ætatis præsertim prætergressa , a repetitis venæ sectionibus in hoc morbi genere lædi , licet pituitosam materiam in sanguine redundantem , pulmonibusque fœmitem inflammatorium præbentem per venas educi existimaret , quamdam mihi dirigendi sanguinis missiones tradidit normam , a qua , nisi quatenus emergentia symptomata postulabant , quantumvis venam quinta vice secarim , nulla ratione recessi , quinimo coriacea sanguinis crusta post tertiam ejusdem missionem conspicua , tanti apud me solum valuit ut cæteris rationibus pondus adderet ad venam quarta , & quinta

ta vice tundendam, cum satis persuasum haberem non esse per se firmum ulterius mittendi sanguinis argumentum, quidquid contra celeberrimos viros Huxamium, & Haen sentiat, durissima Germanorum corpora curans, cæteroquin clarissimus Trillerus, quum primus post detractiorem centum fere unciarum sanguinis, superficiem ejusdem obtegere, extrema etiam agroti jactura, alter in sanis etiam hominibus, hanc observavit: & celeberrimus Tissot ad rem sic sua lingua loquatur: Ilya d'allieurs à cette égard plusieurs bizzareries, qui dependent des plus petites circonstances; ainsi, il ne faut point se fonder uniquement sur cette croûte pour regler les saignées; & en general, il ne faut pas trop croire que l'état du sang dans la palette puisse nous faire juger avec certitude de son véritable état dans le corps (a): Animoque præterea versarer observationem jamdiu ab Asclepiade factam (b), Populum nempe Romanum, atque Athenienses, non tam commode, ac Hellepontum inhabitantes sanguinis missionem in pleuritide; & peripnemonia sustinere, quod primi a meridie propius, Austris expositi, calidiore, & humidiores, hi vero Aquilonis, & Favonii flatibus obnoxii, frigidiores, & sicciores in aere vivant.

#### §. 4.

Ocurrerant præterea menti multa, quæ a suis Ballonio, Dureto, Martiano, Hippocratis geniis, ad hanc rem collegat celeberrimus Baglivi, plurimis Romano in aere medicinam facientibus non satis notus, eaque tantæ auctoritatis erant, ut in determinanda phlebotomia suspensio semper talo processerim: ait (c) enim ex Martiano, duobus tantum in casibus Hippocratem secasse venam, in ea scilicet pleuritide quæ a toto procedens, sanguinis plenitudinem præsefert mediante dolore ad claviculam, & humerum tendente, sive gravitate ad brachium, & circa mam-

(a) Chap. 4. §. 5. de l'in- vel acut. passionum.  
flamm. de Poitrine p. 99. (c) Prax. Med. lib. 1. in  
(b) Secundo Volum. celerum Append. ad Pleur.



17

nam, & in pleuritide sicca, in qua minimum sputi educitur; In aliis speciebus mentionem ejus non fecisse, quippe quæ aut nihil prodest, ut notat lib. de Ratione Victus in acutis tertio, & quarto; vel potius obest, tum ratione humoris peccantis, tum virium quæ debent esse, validæ propter expuitionem, sine qua ager servari non potest. Et ibidem ex Ballonio, Medicos his verbis objurget: Cum in pleuritide vexant dolores venam secamus, cum augmentur audientius secamus: an id bene? Nequaquam; quia dum pus fit, dolores surgunt: an ideo tam sæpe vena secanda? Naturam impedimus; unde nil mirum si multi moriuntur. Deinde, sic ex Dureto loquatur: Si vero infera sit pleuritis sicut dolor vergat ad diaphragma, & spurias costas, tunc rheuma consistens non detrahet phlebotomia, sed purgatio jubente Hippocrate. Et denique ex Ballonio nos moneat, dolores laterum in illis quibus corpora compacta sunt, firma & solida, difficilioris curationis esse, velint nolint Medici repetitas venæ sectiones non conferre, cum spiraculorum cutis obstructio, quominus corpus exhalet, impediat, ægrique frigidus aeri corpora sua exponant, nec lecto continere se velint, quemadmodum in multis se observasse testatur.

§. 5.

Non ea tantum, quæ a memoratis modo viris præcepta desumpsi mittendi sanguinis modum docuere; sciebam enim eximios in arte viros; Boerhaavium, Wansvieten, Huxam, & nuperrime Joannem Oosterdyk in Trajectina ad Rhenum Academia Professore celeberrimo, eadem ipsa monita discipulis suis tradidisse. Missio sanguinis, inquit primus (a), eousque celebrata, ut in hoc morbo, loquitur de vera peripneumonia, nocet admodum, in notha videlicet, ob debiliora viscera; nimisque aliena humida lenta; hinc primo juvare visa, mox mala auget. Alter eundem hunc aph. commentariis illustrans, hoc morbo minus tutum videri pectoris angustiam iteratis sanguinis missionibus levare, hanc quidem, primo phle-

(a) §. 869. C bo-

botomia minui, nimis tamen larga, vel sæpius repetita, lentorem pituitosum nothæ peripneumoniæ materialē causam augeri, adeoque nocere affirmat. Tertius vero (a) sic scribit. Si pulsus debilis, & lentus, ætus minor, vel naturali non multo major, urina pallida, & cruda, cæteraque sic occurrant, admodum cautus in ægroti pulmonici sanguine detrahendo sum, quamquam pondus, & oppressio pectoris valde urgere possint, tanto magis, addit, (b) si catarrhalis aliquid peripneumonia præseferat. Postremus vero in institutionibus medicinæ practicæ in Auditorum usus evulgatis (c) notham peripneumoniam fallax malum venæ sectionem; sed rarius factam requirere docet. Multa adhuc ad hanc rem spectantia testimonia præferre possem; sed cum laudatorum virorum auctoritas ea sit, quæ aliis comprobari non egeat, de iis quæ catharsin respiciunt sermonem adgrediar.

## §. 6.

Sola morte piandum crimen nonnullis visum est morbi hujus initio cuiuscumque generis catharticum propinare; adeo enim terruit ignaros, ut eorum nomen sine horrore ferre non possent; Sagaciores tamen, & præstantiores in arte Medici ad trutinam probe revocata morbi natura, varique ejusdem specie perpensa, eam tanti quandoque fecerunt, ut sine ejusmodi auxilii genere ægros servari non posse putarint. Primus omnium Hipp. ipse facta diligenti affectionis hujus per causas eam producentis divisione (d), non modo catharsin, sed emesin etiam ex veratro albo, thapsia, elaterio consulit, aitque alvum primis quatuor aut quinque diebus subduci oportere, & hoc paulo amplius, quo & febres obtusiores, & dolores leviores sunt, idque eo consilio, ut supernæ partes sint humoris exortes; hoc tamen summo judicio a medico præstari deberi, his verbis paulo post inculcat: Oportet igitur & infernam,

(a) Cap. 3. dissert. de Plev.  
& Perip.  
(b) Cap. 2.

(c) Cap. 3. §. 38.

(d) Lib. 3. de Morbis textu 17.

alvum neque valde suppressam esse, ut ne febres sint acutæ neque valde egerere quo saliva sursum educi possit, & æger viribus valeat; textu vero vigesimosecundo ejusdem libri subdit: at si æger biliosus sit natura, quemlibet excedentem humorem, & cacholiam intellige, & non purgatus, correptus fuerit a morbo, priusquam salivam biliosam expuat, etiam medicamento, bile probe purgato: lib. vero de victus ration. in morbis acutis (a), eadem quæ libro de morbis indigitaverat clarius repetit: si vero sub septo transverso fuerit dolor, ad claviculam autem de se significationem non præbeat, alvum mollire oportet, aut veratro nigro, aut peplo: quid plura? tanti dejectiones alvi hoc in morbo fecit, ut tex. eodem quinquagesimosecundo purgationem clarissime his verbis præceperit: Medicamentum purgans quarta die exhibeto, verum per tres ab initio infusum per clysterem adhibeto, & si hinc non allevetur, sic subpurgato. Aretæus etiam veteris medicinæ decus (b) ait opus esse humores, & status post venæ sectionem deorsum versus trahere nitro, melle, ruta, resina terebinthi liquida sedem obliniendo, missionisque sanguinis loco, si quid majus impedimentum sit, acrem succum per clysterem in sedem immittere, puta falem cum nitro, aut terebinthi resina cum melle. Multa adhuc a veteribus maximæ notæ Medicis ad sententiam meam congerere possem, sed cum ferme omnes in Hipp. opinionem plus minusve concedant, non est cur in eorum placitis evolvendis ulterius operam perdam, cum præstet potius eorum doctrinam illustriam in arte Recentiorum, praxi confirmare; sed antequam facio quem morbum pleuritis nomine Prisci medicinæ parentes insigniverint paucis exponam, ne illos de mera tantum, & exquisita pleuritide loquentes ad peripneumoniam invitos traxisse videar. Verum quidem est eos, morbos hosce inter se distinguere scripsisse, sed easdem utrique notas assignant, id-

C 2

(a) Text. 12. &amp; 52.

(b) De Curat. Acut. Morbor. lib. 2. cap. 10.

que facile animadvertere licet, quod, quæ apud illos de pleuritidis caractere leguntur, ad pleuritidem quidem referenda sint, sed cum peripneumonia conjunctam; etenim peripneumonia simplex, atque incomitata in eorum scriptis occurrit; de pleuritide verò, quæ peripneumoniam non habuerit adjunctam, nisi semel apud Hipp. (a), nihil usquam invenio; unde, quam de pleuritidis curatione ex iis hausi, protulique doctrinam, ad peripneumoniam simul posse referri non immerito judicavi, cum jamdiu Sydhenam. ipse (b) sic senserit: quam ego, inquit, loquitur de vera peripneumonia, ejusdem plane indolis cum pleuritide esse arbitror, atque ab illa in eo tantum differre, quod peripneumonia pulmones universalius afficiat: quod denique præsidia quæ ab Hipp. adversus pleuritidem adhibebantur, a Recentioribus in notha potius, aut mixta peripneumonia commendentur.

## §. 7.

Quicumque ergo Divini Senis tutissimam medendi rationem secuti sunt, eandem tenuere viam. Thomas Sydhenam inter Anglos Hippocrates (c) suam sic theraphejam exponit. Catharsin ergo celebriorem venæ sectioni succenturiabam, quæ ei satis rectæ substituitur in iis qui a largiori, & iterata sæpius phlebotomia abhorrent. . . . . A prima venæ sectione, die sequenti potionem Catharticam ex cassia, senna, agarico trochiscato manna, & syrupo rosar. solutivo, propino, postridie sanguinem secunda vice mittere soleo atque interjecto die uno potionem catharticam modo præscriptam iterum exhibeo, diebus alternis jugiter repetendam, ... ptisanam ex hordeo, & liquiritia pro potu ordinario concedo; atque ita quidem methodo vincenda est peripneumonia hæc notha orta ab exundanti pituitosa colluvie in sanguine aggelata ob

hyc-

(a) Lib. 1. de morbis n. 25.  
& secundo n. 42.

(b) Observ. Medic. sect. 6.

cap. 4.

(c) Observ. Medic. sect. 6.  
cap. citat.

hyemis analogiam in pulmones explosa . Eadem , sed moderatior est æque celeberrimi Angli praxis . Huxam (a) frequentes alvi defectiones hoc in morbo salutares affirmat : ut quolibet , inquit , altero die post unam alteramque sanguinis emissionem , educatur alvus , suadet Sydenham ; hoc vero in utroque respectu nimium excedere existimo ; licet enim sanguinis detractio ; & alvi quoque purgatio in principiis necessaria esse possint , illam tamen repetere rarissime convenit , hac autem maxima cum cautione tentari debet , si in primis repetenda est , nam in animi deliquium , & sudores , cæteraque proclivis est ager ..... Harum binarum evacuationum respectu aliquid observandum est , si nempe agrotus materiem coctam , copiosam excreat , quod haud raro in hac quoque peripneumonia fieri solet , neque hæc , neque illa convenit , ac laxantia clysmata , vel mitiora eccoprotica sola ad minimum donec copiosa perdurat excreatio , sunt danda ; Si vero inquit (b) catharralis quid mixtum habeat peripneumonia , sæpius purgantium bonum expertus sum effectum , licet ea in illis quas materiæ coctæ laudabilis comitatur excreatio omnino noceant quod Auctor quoque libr. 3. de Morbis section. 58. in scriptis Hippocrat. comendat . Baglivius quoque (c) præter Martiani , Dufeti , Ballonii opinionem , suam , sic sententiam expromit . Ipse tamen ut cautius procedam soleo primis diebus alvum clysteribus mollire , etiam bis in die si magna sit cacochiliæ copia in præcordiis , & pulmo sit nimium inflammatus , quod si effectus inflammatorii multa signa non adsint , & lingua sit humida , urina non multum accensa , & calor non multum acris , purgatio etiam præscribenda ex cassia , syrup. rosat. aureo &c. Summus etiam Boerhaavius , & Syvieten praxim eandem sequuntur , suadentque . Curatur , ait (d) hac

(a) Cap. 3. dissertationis de  
Pleuritid. & Peripneum.

(c) Loco citat.

(d) §. 873.

(b) Cap. 2. ejusdem dissert.

hac methodo cautissima ; mittatur sanguis ex largo vulnere ; mox eluvatur alvus clysmate , quod repetatur quotidie donec signa docuerint levare pulmonem ; quod Commentator egregius his verbis confirmat : Talia autem purgantia quæ solvendi vi simul agunt , non autem subducunt de corpore liquidissima prodesse posse videntur . Prudentissimus Anonimus Auctor in adnotationibus ad Opera celeberrimi Tissot in Populi utilitatem vulgata (a) , sic Gallica lingua nos monet. Lorsqu'il ya une putridité abondante dans les premières voies , on est obligé d' user des purgatifs , comme des émétiques . Denique supra laudatus Oosterdyk (b) , Aphoristico , ut solet , modo hujus morbi therapejam proponit : Clysmata , inquit , resolventia , stimulantia paulo fortiora quam vera , peripneumonia , requirit . Quid si mitiora eccoprotica anacatharsi conducere putem ? sic in suo Tabidorum Theatro dum regulas evacuationi dicatas præscribit patientissimus observator Bennet nobis tradidit inquit (c) : dum anacatharsi studendum præmittenda minorativa . Longus nimis essem si auctoritates omnes Celeberrimorum Virorum ad purgationem tuendam vellem una epistola simul congregare ; satis enim superque ex horum , quos attuli , praxi constare puto , non sine maximo consilio , me talem morbum descriptis auxiliis adgressum fuisse . Nonnulla modo de maxima Vescicantium utilitate dicenda supersunt .

### §. 8.

Tanti apud veteres translatio materiei hunc morbum facientis ad inferiores partes habita fuit , ut Pater Hippo : hanc metastasin tutissimum salutis signum arbitravit , ait namque (d) : Abscessus ad crura in periculosis inflammationibus pulmonis omnes quidem utiles sunt . Recentiores autem naturæ molimina secuti , hanc arte excitare conati sunt .

(a) Cap. 4. de Pectoris inflammatione .

(b) Eodem §.

(c) Pag. 120.

(d) Coac. Tranor. sect. 2. cap. 15. num. 495. , & 510. Edit. Makiana .

sunt. Baglivius (a) Boerhaavius (b) Svvieten (c) Hum-  
 xam (d) Tissot (e) Trillerus (f) aliique celeberrimi me-  
 moratis partibus admove- re, usumque persuadent; immo  
 Aretæi forsân auctoritate suffulti Recentiores, affecto la-  
 teri hoc remedii genus maximo ægrorum commo- do multis  
 abhinc annis imponere caperunt. Inquit enim (g) Si ad  
 quamcumque partem corporis humores distrahantur, &  
 spiritus, ad extima evocetur quibus pulmô oprimitur ali-  
 quod mali solamen invenias; omni enim ex parte Pulmona-  
 ria obsidenda, impugnandaque est; Re autem vera (h) ana-  
 logum a memoratis Auctoribus proposito, sed crudelius  
 consulit remedium; magnam nempe Cucurbitulam dolenti  
 loco superimpositam, eoque constructam modo, ut flam-  
 ma subteraccensa per aliquod temporis spatium perduret,  
 qua extincta, scarificationem jubet, ut tanta sanguinis  
 copia, quanta vires patiuntur, educatur. Post illum ele-  
 gantissimus Celsus (i) mitius, sed consimile proposuit  
 auxilium his verbis. Recte etiam synapi ex aceto super  
 pectus imponitur donec ulcera pustulasque excitet, &  
 tum medicamentum quod humorem illum citet; cap. ve-  
 ro 7. ejusdem libri. Prodest etiam, inquit, impositus su-  
 per pectus sal bene contritus cum cerato mistus quia levi-  
 ter cutem erodit, eoque, impetum materiæ qua pulmo  
 vexatur, evocat. Hæc veterum inventa nostra hac æta-  
 te primus renovavit Mons-Pussillanus Doctor Turquet de  
 Mayerne (k) deinde Richardus Mead (l) Franciscus Rai-  
 mond

(a) *Prax. Med. lib. 1. cap. de Pleuritid.* (b) *Lib. 2. Acut. Morb. cap. 10.*

(b) *Aph. 874.* (i) *Lib. 4. cap. 6. de Me-*

(c) *Comm. in eundem.* *dicina.*

(d) *Dissert. laudata p. 208.* (k) *Libro de Morb. intern.*

(e) *Memorato cap. p. 107.* *Syntagm. cap. 5. de Pleuri-*

(f) *Libello de Pleur. cap. 4.* *tide.*

p. 34. (l) *Monit. & Trac. Medic.*

(g) *Lib. 2. de Curat. Acut. sect. 7. de Pleurit.*  
*Morb. cap. 1.*

mond, Robertus Whytt, Pringle, Huxam, Tissot, aliique non pauci, qui Cantharidum virtutem in similibus, aut congeneribus morbis, non sine magna ægrorum utilitate explorarunt. Neque eo tantum consilio Recentioribus placuit hoc uti remedio, ut materiem pectus lædentem extra vocarent, quod veteribus erat in votis; verum cum alkalinam summe attenuantem incidentem, & resolventem virtutem in cantharidibus & synapi animadvertissent, ad rem maxime hoc remedium facere putarunt. Re quidem vera Romanæ quondam Reipub. Medicæ ornamentum & gloria Georgius Baglivi dissertationi egregiæ de usu, & abusu Vesicantium, sic finem imponit (a). Morbi igitur, in quibus præ cæteris convenire possunt vesicantia, sunt... Catharri a viscida materia pendent, & irruptionem minantes in pulmones, vel aliam nobiliorem partem, nares, oculos, fauces, pectus &c... Demum in omnibus aliis, in quibus necesse est solvere, divellere, derivare, excitare, & similia agere.

#### §. 9.

Hactenus de potioribus remediis quæ primis morbi temporibus præscribi solent, fortasse etiam pluribus egi: pauca modo de Fotubus, Alterantibus, & Diata: Quæ ad illorum usum & utilitatem pertinent, e divinis Hippocratis scriptis (b) & a citatis Auctoribus, omnia memoratis antea locis decerpsi. Horum vero tanta est vis, ut nil magis efficaciter impactam pulmonibus materiam attenuando, & resolvendo excreatum promovheat, tanto magis si eorum materia ex refrigerantium, relaxantium, & saponaceorum leviter diluentium familia desumatur, qualia sunt tenue lactis serum, ptisana ex hordeo, avena, liquiritia, cæterisque similibus, quæ si limonum succo faturentur, sæpe, tepideque bibantur, rem magis utilem præstant, præsertim vero si mel istis addatur, & acetum quem admodum Hipp: (c) facere consuevit & lib. 3. de mor-

(a) Pag. 438.

Morbis Acut. num. 11. & 12.

(b) De Ratione Viſt. in.

(c) De Viſt. Acut. n. 30.



morbis (a) passim præcipit. Quibus omnibus Aretæus (b) subscribit. Eadem ipsa est Celebrium Recentiorum methodus, hanc nobis consulunt Sydhenam, Boerhaave, Svvieten, Huxam, Baglivi, Tissot, alique similis notæ Medici, quin imo oximel scilliticum moderata dosi syrupis pectoralibus sociatum, post debitas venæ sectiones proponunt, eique camphoræ nonnihil miscendum eo consilio suadent. De diætâ modo, hoc in morbo necessaria pauca loquar; Sed opere prætium est nonnulla prius de hippnoticis quorum apud me fuit usus, ex Auctoribus desumpta præponam.

§. 10.

Ego quidem non inficior opiatorum usum in mera peripneumonia notha tantæ non esse utilitatis, & ab Auctoribus probari, quantum in vera, & pleuritide fieri solet, hunc potius sub morbi initio, licet deinde inclinante conveniat, noxium esse sentio: Verum symptomata venæ peripneumonix communia, ut doloris, & tussis violentia, huic quandoque junguntur, morbique fomitem & causam ita adaugent, ut eis necessario peculiaribus sit occurrendum auxiliis; Etenim cum dolor sit stimulus quo sanguinis circuitus accelleratur, & accenditur, adque partem dolentem plus justo avocatur; ejusdem stasis, & inflammatio in loco dolore affecto necessario debet augeri, si præterea tussis agitatione nimia qua partes commovet, simul adjungatur. Aretæus, (c) licet ad somnum conciliandum ne furor hominem corripere, somnificia medicamenta propinare non dubitavit. Sydhenam, Huxam, Baglivi, Boerhaave, Svvieten, Trillerus, Tissot (d) ad dolorem, tussimque sedandam ob memoratas modo rationes, anodyna præscripserunt. Videndum modo num regula diætetica toto morbi decursu servata, Auctoritatibus, & rationi accommodata fuerit.

D

Pars

- (a) Num. 15., & 18. (c) Lib. 2. Acut. Mor. capit. 1.  
 (b) Libris 1., & 2. de Cur. Acut. morbo. capit. 10., & 1. (d) Lib. supra citat.

Pars hæc medicinæ practicæ ab Hippoc. (a) Sacramento culta nostris hisce diebus a quibusdam adeo parvi fit, ut ad morborum curationem ferme nihil conferre judicetur; Alia tamen fuit Divini Senis opinio qui integrum librum de Ration. Vict. in morbis acutis, & Aphorism: Sectionem primam in Posterum utilitatem conscripsit; Præcepta hisce voluminibus comprehensa adeo utilia, & salutaria suis in agris expertus est Vir maximus Antonius de Haen, ut discipulis suis, in Nosocomio Practico Vidobonensi, ipso duce imitanda proposuerit, nobisque ejus præstantiam (b) commendarit: Quem ego toto morbi decursu victum præscripsi, eundem ipse suis agris imperabat: Decoctum, puls, cremor hordei, avenæ, eadem ipsissima sunt quæ de hujus morbi regimine diætetico Sapientissimus Cœus (c) nobis mandavit.

## §. 12.

Hæc omnia fuere præsidia quæ ante judicationis tempus ad morbificæ materiæ coctionem promovendam adhibui, sine qua de cujuscumque morbi perfecta crisi Medico jure desperandum est: cum enim tota medicinæ practicæ vis in debita materia corpus lædentis pependit, deinde evacuatione consistat, in id Medicus incumbere debet, ut naturæ conamina totis viribus ad opus adjuvet. Mutatio hæc quæ statutis a natura diebus ut plurimum fieri solet, sic ab Hipp. (d) post enumerationem symptomatum peripneumonix, describitur: Hæc autem patitur homo minimum diebus 14., ad summum una, & 20., & per hoc tempus tussit vehementer, & una cum tussi purgatur, primum saliva multa, & spumosa, septima vero, & octava die ubi febris in vigore fuerit, si humida sit peripneumonia, crassior prodierit, sin minus, non, nona vero, & decima cum virore pallida & subcruenta, duodecima usque ad decimaquartam multa, & purulenta; Atque

(a) In Jurejurand. n. 20.

(c) Memorati lib. num. 52.

(b) Cap. 1. Vol. 1. suorum Operum de Ratione medendi.

(d) Lib. 3. de morbis n. 16.

que hoc in his contingit quorum natura, & corporis affectiones humidae sunt, & morbus fortis est; quorum vero, & natura, & corporis constitutio sicca est, in his minus: Siquidem igitur decimaquarta die resiccatus fuerit, & non amplius purulentum tussiendo rejecerit, sanus evadet, sin minus interroga ipsum an dulcior sit saliva, & si affirmaverit, hoc scito pulmonem suppuratum esse (a): Quicumque vero peripneumonici non purgati sunt iudicatoriis diebus sed mente moti decimaquartam diem effugerunt eos periculum est suppuratos fieri (b): si peripneumonia correptus in iudicatoriis diebus non purgetur, sed relinquatur in pulmone sputum, ac pituita, suppuratus fit (c): Si ad dies perveniunt duos, & 20., & febris remittat, & in his per sputum purgati non fuerint, suppurati fiunt. Hic est morbi exitus, ni debita Anacatharsi solvatur.

### §. 13.

Verum non unam hanc esse crisis viam Hipp: ipse (d) his verbis apertissime docet. Quicumque vero dolores ex his locis, de morbis pulmonum agit, neque per sputorum expurgationes, neque per faccum alvi defectionem, neque per venae sectiones, & victus rationes, & purgationes sedantur, eos suppurationem concitatuos esse sciendum est: Libro vero de Rat. vict. in morbis Acut. (e) multitudinem, & urinarum crassitiam ad morbi solutionem quoque conferre observavit, quod & Aretæus lib. 2. de causis & signis Acut. morbor. capit. 1. ubi crisis etiam e vehementi narium hæmorrhagia adjungit, post illud probe notavit. Inter Recentiores clarissimus Huxam, criticis evacuationibus, sudores passim in sæpius laudata dissertatione recenset; verum caput secundum ejusdem sic claudit. Quamquam varias has, suæ relevandæ,

D 2

me-

(a) Idem Aph. 8. sect. 5.  
& coac. Prænot. cap. 15. section. 2. num. 520.

(b) Lib. 1. de Morbis n. 10.

(c) Ibid. num. 24.

(d) Prænot. libro, sect. 2.  
cap. 9. num. 18. & Coac. Prænot. sect. 2. cap. 18. n. 490.

(e) Num. 53.

methodos in morbis pulmonicis eligit natura ; ejus tamen proprium , & consuetum conamen est excreatio , & donec hæc bene procedat , ejus conamen quidem juvare , numquam vero interrompere debemus ..... ita ut reliquæ evacuationes tantummodo naturæ diverticula esse videantur , & tunc materia morbofa tantum fortius per eas transprimitur , quantum via regia , vel clausa est , vel valde molesta . Cum ergo toto judicationis tempore ad crîsim quamcumque inutilis fuerit naturæ labor , unus ab Hippocrate præcognitus expectandus erat in Vomicam aut Empyema exitus , qui , quomodo prævisus , & qua methodo novus hic gravissimus morbus curatus fuerit , modo dicendum erat .

#### §. 14.

Verrente decimaquarta morbi die futuræ suppurationis signa nonnulla jam supra in historia morbi observari dicebam . Hæc autem in dies numero & ordine ab Hippocr. descripto ita crescebant ut graphicam in ejus monumentis ægri mei descriptionem viderem : sic namque (a) scripsit : Qui suppurati fiunt maxime ex pleuritide , & peripneumonia , eos calores comitantur interdium tenues , noctu vehementiores , & nihil memoratu dignum spūunt , & circa collum , ac claviculam sudant , & oculi cavi fiunt , malæ vero rubent , his digiti quidem manuum summi calescunt , ac scabri reduntur , unguis autem adunci fiunt , ac ipsi perfrigerantur & circa pedes tumores habent , & per corpus pustulas , & abstinēt a cibis : eandem hanc prædictionem repetit in Prognost. libro (b) variis in locis (c) Qui suppurati , inquit , futuri sunt primum salsuginosum spūunt , deinde dulcius (d) Lateris inquit dolor cum febre diuturna puris educationem fore significat : Horrore affecti frequenter ad suppurationem deveniunt . Ipse quoque Arcæus

(a) *Coac. Prænot. sect. 2.*

*cap. 15. num. 560. 70.*

(b) *Sect. 2. cap. 10. numero 250. 60.*

(c) *Num. 600.*

(d) *Num. 640.*

exus (a) exitum eundem prænuntiavit his verbis: Ceterum si morbus productior sit, dolor est pertinax, & humida sit expurgatio, tunc purulentum hominem fore sperato. Quodnam in latus, & qua lateris parte suppurationis hujus sedes esset, gravitatem in latus dexterum (quod Hipp. (b) optandum esse scribit) doloris situm satis demonstrare docuit Hippoc. (c) his verbis: Si vero suppuratio fuerit dumtaxat in altero latere, interrogare oportet ægrum in latus sanum decumbentem si quod ei pondus desuper impendere videatur; si enim hoc fuerit, in altero latere suppuratio est in quo pondus affuerit; & Coac. Prænot. (d) Quibus juxta mediam costam dolor fuit, media pulmonis pars ægrotat, quibus ad septum transversum, inferna.

### §. 15.

Dignosticis hisce certissimis signis de abscessu, & ejus sede certus, audiendum erat circa eruptionis ejusdem tempus Divini Senis Oraculum, quod ex Prognost. (e) & Coac. Prænot. lib. (f) clarissimis verbis idem eruitur. Rumpuntur autem, inquit in Coac., plurimæ vomicæ partim 20. die, partim 40., partim 60. Quibus igitur dolor in principio incumbit intentus, & spirandi difficultas, & tussis cum sputatione, ad 20. diem, aut citius eruptionem expecta; Quibus autem leviora hæc sunt, serius pro ratione: supputare autem oportet tempus à quo primum doluit, aut gravatus fuit, aut febriit, aut, si, quando rigor corripuit. Necesse est autem præcedere & dolorem, & spirandi difficultatem, & sputationem ante eruptionem.

### §. 16.

Hic est secundum Hippoc. pulmonalis Apostematis exitus,

- |   |   |
|---|---|
| (a) <i>Libris 1. de curat. Acut.</i>                                  | <i>cap. 10. num. 240. §.</i>            |
| <i>M. ro. cap. 10., &amp; 2. de causis &amp; signis Acut. Morbor.</i> | (d) <i>Seç. 2. cap. 15. n. 540.</i>     |
| <i>cap. 1.</i>  | (e) <i>Seç. 2. cap. 10. n. 270. 80.</i> |
| (b) <i>Lib. 2. de Morb. n. 45.</i>                                    | (f) <i>Seç. 2. cap. 15. n. 575.</i>     |
| (c) <i>Libr. Prægnost. seç. 2.</i>                                    |   |

tus, sed non extremus mali terminus est: Etenim cum multiplex ille sit (a), interdum sicut exsiccat, alias serpendo, totum pulmonem occupet, quandoque membrana pus continens disrumpatur, & quidem ita, ut effluens inde pus, vel in thoracis, vel mediastini cavum, vel in bronchia, & pulmonales vesiculas, aut cellulofam pulmonis substantiam feratur; Aliquando deniq. ut Hippocrati lib. 1. de Morbis (b) placuit, in latere tumorem, & abscessum faciat, sollicitus, & anceps animus erat, num in mortem vel lentam, vel subitam, vel sanitatem futurus hic esset: Sciens autem eos maxime, licet ægre, fervari quibus vel exsiccat, vel rupto, juxta Aretæum (c) pus lente in bronchiorum ramos deponitur, indeque sensim erumpit, & ex symptomatibus quæ in morbi decursu observaveram, non exiguum ab hoc in pulmone spatium occupatum iri, proindeque difficile admodum exsiccare posse prævidens, in id studium omne, & operam contuli ut saltem alterum assequi possem; Hinc est, ut statim sub initio, dum ipsum gignebatur, tam per externa, quam per interna laxantia, emollientia, mucilaginoso, blanda, oleoso, dulcia, bechicis, & blande expectorantibus intermixtis suppurationem accelerare tentarim, donec instaret eruptionis tempus ab Hipp. per proxima signa superiori §. indicatum, tunc juxta ejusdem consilium (d), leviter irritantibus de oximelle scillitico, dilutis succo limonum saturatis, & calide ingestis, hanc molliri fategi, quod, ob ægri constitutionem, symptomatum, & morbi naturam, die 37., ex quo rigor illum corripuit, contigisse, jam supra in historia memoravi: Hastenus Hippocraticæ doctrinæ veritatem primi morbi eventus luculenter confirmavit: Videndum modo superest quæ fuerit ejusdem de successione morbosa sententiam.

Quem-

(a) Vide Aretæum lib. 2. de *Caus. Diuturn. affectuum caus. sign. & Caus. Acut. Morb. c. 1.* pit. 2.

(b) Num. 11.

(c) Lib. 2. de Morb. n. 44.

(d) Lib. 1. de signis, & traditum.

§. 17.

Quemadmodum in externa inflammatione quacumque quæ abscessu finiatur indicatio curativa postulat ut collecti puris exitus promovheatur, genitum ulcus detergatur, & exsiccet, sic in pulmonalis Apostematis curatione indicationes omnes eo dirigendas esse, eadem ipsa dogmatica medicina requirit. Quo autem temporis spatio, quibus signis prævideri posset, summus idem Medicinæ parens Hipp., qui superioris morbi naturam, curandi, & exitum prævidendi rationem docuerat, id ipsum indicare debebat. Re enim vera de suppuratis, more sibi consueto, sermonem habens (a), inquit eos, qui ex pleuritide suppurati sunt servari, si intra 40. diæ ex quo ruptio facta fuerit superne repurgentur, sin minus ad tabem transire: ubi vero de signis salutem promittentibus (b) loquitur, ait bonum esse omnibus circa pulmonem morbis, facile morbum ferre, a dolore liberari, sputum facile educere, bene spirare, non sitire, totum corpus æqualiter calefcere, ac molle esse, somnos, sudores, urinas, alvi defectiones bonas esse, hominemque servari posse, si hisce omnibus bonum quoque sputum accesserit. Libro autem Prognostico: (c) supersites potissimum eos omnes futuros asserit, quos febris eodem post ruptionem die dimiserit, qui cibos celeriter appetant, & siti liberati sint, quorum alvus tum exigua, tum compacta dejiciat, qui pus album leve, ejusdem coloris sine pituita, & citra dolorem, & tussim vehementem excreent; hosque optime, & celerrime liberari, quibus hæc omnia accident, sin minus, hos, quibus hæc proxima contingent.

§. 18.

Licet autem hæc omnia morbi faustum præfagiant exitum, timorem tamen omnem non eripere Hipp. ipse (d) advertit; inquit enim a maturatione, & ruptione Apostema,

(a) Aph. 15. sect. 5.

(c) Sect. 2. num. 280.

(b) In Coac. Præn. n. 475.

(d) Lib. 1. de Morb. n. 14.

matris opus esse ut sursum pus vertatur, totumque expuatur, & venter in quo continebatur confidat, & exsiccet, ut aeger sanus evadat; quod quantum difficultatis habeat, filius ejus interpret Galeanus (a) his verbis declarat: Neque enim citra tussim expurgari possunt, illisque tussientibus laceratur locus; Itaque quasi per mutuas operas malum illis in orbem redit, quæ namque lacerata sunt rursus phlegmonem excitant; secundo rursus phlegmonem maturari, & pus expurgari desiderant.

#### §. 19.

Aretæus etiam diuturna observatione edoctus (b) ubi de puris abscessum facientis proprietatibus, & evacuatione loquitur, sic prognosin suam instituit. At si jam rupta Vomica sit strangulatus discrimen impendet, si multum, subitaneumque pus emanavit, si pedetentim vero emittatur, exacte sanitas advenit: Varias deinde puris condiciones, & vias per quas excernitur recensens, addit: Utque in summa de pure dictum sit, quæcumque alba feruntur, concocta, inodora, levia, rotunda, & celerius extussuntur, aut per alvum deturbantur, hæc tuta, & salutaria sunt... Ad hæc habitum simul animadvertere convenit, & quæ morbum comitantur; nam si excreationem bene tolerat, febre vacat, recte concoquit, bene coloratus est, bene ad cibos se habet, si facile extussit, si arteriarum motus bonus est, si vires firmæ, ægrotus perniciem evadit. Subdit denique considerata esse loca, quæ ab Apostematibus depascuntur, & ab his brevitatis vel longitudinis morbi, salutis, vel interitus præsaſagiones desumendas esse, clauditque caput his verbis. Lien, jecur, & pulmo, & interseptum celerius quidem pus ducunt, sed periculosa, & mortifera sunt.

#### §. 20.

Regiam materiæ pulmones obsidentis viam esse tracheam §. 13. Huxamius asserbat; dubitandum tamen non est

(a) *Lib. 5. Meth. Medend. cap. 11.*

(b) *Lib. de notis, & caus. diuturnorum Affect. cap. 9.*



est multam quandoque, sive per azigon, ut Hieron. Fabrit. (a) Nicolao Novocomensi, & Gabrieli Falloppio, sive per phrenicas venas, ut Marco Aurelio Severino (b) placuit, inde ad ureteres defferri. Hujus generis evacuationem in Phytione (c) se vidisse memorat Hippocrates, & Joannes Freind (d) aliquando contingere scribit, quod quomodo fiat Huxamus idem, (e) sic exponit. Quod si autem inflammatoriæ pulmonum obstructionis resolutio, aut coctio accidit, non pars solum in bronchiorum cava impellitur, & ita excreatur, sed pars quoque in venas adhærentes transit, indeque cum reliquo sanguine ope communis circuitus commovetur, donec tandem partim per urinam crassam, turbidam, larga quantitate eliminetur, in qua id, quod desidit copiosum, rubrum, vel flavum est, & in morbis peripneumonicis semper bona prænunciat... quam crassam subsidentem, rubicundam urinam in pleuritide securum esse signum, eamque si crassa, copiosa sputisque maturis conjuncta sit auferre peripneumonias (f) observavit Hipp.

#### §. 21.

Summorum Præceptorum placitis de morbi hujus exitu, & varia critica evacuationis via sic exploratis, juxta eorundem therapejam, perniciosissimæ hujus affectionis curationem suscipio, & ad sputorum, urinarumque indolem, quantitatem, & utilitatem præcipuas observationes meas converto: Quamvis autem perfectam illam proprietatem a medicinæ Proceribus Hippoc. & Aretæo, §. 17., 19. exoptatam in illa sputorum congerie primo impetu parvo artis conamine a natura projecta, ignemque febrilem ipso eruptionis die non extingui observarim,

E

pror-

(a) *Lib. de Oper. Chirurg. Cap. de thoracis sect. in empiem.*

(b) *Lib. de Recondita abscessuum natura Consult. singul. p. 26.*

(c) *Lib. 3. Epid. Ægr. 1.*

(d) *Oper. Omnium tom. 2. Comm. 5.*

(e) *Laudatæ Dissert. cap. 2.*

(f) *Lib. Coac. Præn. n. 385. & de Viñ. Acut. n. 53.*

prorsus tamen animo non dejicior, cum ægri sanguineo-pituitosam temperiem, ætatem, anni tempus indeque mixtam morbi indolem §. 1. , tardumque processum, pulmonis affecti situm, falici etiam præfagio, talia proferre posse phænomena, extremis §. 17. verbis Hippoc. ipse sponderit, & Holler: (a) rationibus confirmarit.

#### §. 22.

Ergo vires artis omnes ad ulteriorem morbificæ materiæ pulmonem obsidentis coctionem, & eliminationem dirigo, humorum acrem indolem demulcentibus, involventibus, simul corrigere, & aperientibus deterisivis, ad exitum disponere, nitor: primæ indicationi parata ex melle, syrup. de Althea, è 5. radicibus aperitivis, dein per gradus terebintho, olibano, myrrha, balsamo peruviano, habitaque ratione temperamenti, etiam gutta aliqua sulphuris; alteri vero sero lactis cichoreo alterati, indeque lacte asinino, victu e cerealium familia, multa aqua diluto, satisfacio: hancque medendi methodum eo libentius amplector, & pressius sequor, quod una, tutior sit phthisi avertendi ratio, quippe sanguinis, aliorumque humorum perversam crasin corrigere valeat, quod absque discrimine vitæ haud negligi posse Bennetus, dum nemini cui pulmo erosus fuerit, sine sanguinis totius edulcoratione, & reductione (b), se curatum vidisse affirmavit.

#### §. 23.

Hippocrates libris (c) de Morbis, de Internis affectionibus, & de Victus ratione in morbis acutis, ubi de pulmonum affectibus verba facit passim expectorantia, & aperientia remedia a meis non multum diversa memorat; Nucem pineam, & Galbanum in melle Attico, Abrotanum in aceto mulso, Hydromel, Oximel, Arum, Radicis Cappari cortex, & semina, Piper, Nitrum, Hyssopum, Synapi, Nasturtium, ex quibus, prout magis, minusque excreatum promovere studebat, haustus tepide propinandos

(a) In Schol. ad Aphor. 38. sect. 7.

(b) Laudati Libr. cap. 22.

(c) Primo, Secundo, Tertio.

35

dos parabat : Aretæus etiam (a) Decoctum ex Iride, Hyssopo, & Liquiritia in mulsâ, vel Glycyrrhizam cum sesamo tritam, vel medicamentum ex Marrubio cumpositum, aut potionem aliquam, admixto Hydromelle, ex Paulo Ægineta (b) proponit. Eandem uterque deinde tenuit in reliquo curationis stadio medendi rationem. Ille lib. de Internis Affectionibus (c) ubi de pulmonis arteria fauciata loquitur, ægrumque sic affectum eodem modo quo suppurati curandum præcipit : Sorbitiones farinæ, aut milii, si febre vexabatur; post purgationem, si ea quidem indigebat, farinæ coctæ, pinguis uncias decem, absorbendas, & aquam bibendam præscribebat, bis, aut ter de die, cibum huiusmodi exhibebat, sic paulatim donec venter roboratus erat procedere solebat, nam ex febribus, & inædia, licet os appetat, ventrem suscipere nolle affirmabat, ubi vero accervatim suscepit, inflammari; quare paulatim exhibendum esse præscribit : polentam non falsam, puram, tenuem in lacte caprino coctam quam liquidissime absorbendam, ingerebat; si vero decoctum in lacte sorbere se posse negabat æger, lac bubulum tertia parte aquæ mulsæ admixtum propinabat, sicque celerrime sanum fieri spondebat. Aretæus autem (a) uno lacte, & ptisana rem omnem confici posse putavit : Lac, inquit, assumptu suave, potu facilissimum, nutritu solidum, & qualibet esca a pueritia familiaris est, præterea visui colore delectabile, medicamen arteriam non asperans, guttur lavigans, ad ejiciendam pituitam facilem spiritum reddens, inferiorem exitum lubricum efficiens, ulceribus dulce subsidium, & quolibet alio benignius : Si quis multum lactis potat, nullo alio eget alimento, in morbo enim bonum medicamen est lac, & alimentum efficitur ... quod si alia esca indigeat, ptisanæ cremor, concoctu facilis, tenuis materiæ est.

E 2.

Sum-

(a) Lib. 1. de Curat. diutur.  
*Affect.* cap. 9. & 10.  
 (b) Lib. 3. cap. 30., & 32.

(c) Num. 1.  
 (d) *Laudati lib.* cap. 8.

## §. 24.

Summus Bennet qui accuratissimas ad hunc morbum etiam spectantes observationes, vitæ prætio comparatas, in suo Tabidorum theatro, nobis reliquit, dum regulas expectorationi dicatas nobis proponit (a): Detersivis, ait, expectorantibus, eousque incumbat Medicus donec sputum debitum colorem aquisiverit .... Sanguinis autem, & succorum æquationi, & maturationi incumbendum, quousque morbus prorsus evanuerit, nam tonus viscerum naturalis hisce conatibus reducitur, & confirmatur: Inter expectorantia detergentia maxime proficua invenimus quæ ex Abiete, Pino, & Terebinthino conficiuntur. Medicamenta acria, & stimulantia, §. 21., torpidis, eaque de causa congestionem nimis tolerantibus, solummodo concedenda: Ubi vero liquores salledine & mordacitate scatentes, medicamentis, & diætâ roscido lentiori dicatis corrigere & edulcorare satagit (b) sic ait: Huic negotio haud parum interservire creditur Lac, omneque ejus genus, suis non indiget encomiis, quod quidem sine dispendio, aliquoties forsan in usum ducatur; ejus vero serum præscriptorum selectissimis alteratum, nullam incommoditatis suspensionem præferet.

## §. 25.

Eadem eximius in arte, sed hoc præcipue in morbo curando Richardus Morton (c) jam consuluerat. Si vero, inquit, phthisis a diruptione Apoltematis glandulosi sese per tracheam exonerantis proveniat, purgatio pulmonum per hanc regiam viam copioso usu medicaminum expectorantium promovenda est, & si metus fuerit strangulationis post primam Apoltematis diruptionem, a materia scilicet nimis confertim in Bronchia irruente, expectoratio accelleranda est exhibitione Oximell: scillit:, vel aliorum leniorum vomitorum .... Majori parte collectæ materiæ hoc modo jam evacuata, reliqua etiam pars quo-

(a) Pag. 125.

(b) Pag. 146.

(c) Phthisylogia lib. 3. capit. 10.

quotidie educenda est assiduo medicaminum expectorantium usu; quo facto per Lacteam dietam, temperata Julapia, medicamenta balsamica (pilul. nempe lib. 2. p. 86. & balsama lib. 3. p. 133. indicata meis pene similia) aquas minerales, calybeatas in aere rusticano, & salutifero sumptas, curatio paulatim decursu temporis perfici potest; Quod sola lactea dieta, & balsamicis auxiliis mirabili successu alter ex Anglis celeberrimus Ricardus Mead (a) se præstitisse refert his verbis: Vidi enim cum materiæ purulentæ usque adeo graveolentis, & fætidæ, ut aditantes cubiculum ferre non possent, libra una, aut altera admixto sanguine, tussi rejiceretur, & tamen lacteæ dietæ, & balsamicorum usu, interpositis, pro re nata, anodynis, in integram sanitatem æger restitutus est.

#### §. 26.

Celeberrimus Boerhaave, postquam peripneumoniam in abscessum transire docuerat (b) addit: Simulac signa docuerint Apostema ruptum esse, utendum victu lacteo, vegetabili, lenissimo, nec facile putrescente, tum de die aperientibus deterfivis: quem aphoris: more suo illustrans egreggius Commentator inquit. Lac ergo aqua dilutum pro potu, lac merum pro cibo, vel solum, vel decoctis Orizæ, Hordei, Avenæ, Fragopyri &c. mistum sufficere potest: Olera mollissima, ut Endivia, Lactuca, Spinachia jusculis carnum Animalium quæ vegetabilibus vivunt incocta pariter adhiberi possunt. Medicamenta autem hinc in primis laudantur talia, quæ copiosæ aquæ infusa, leni aperiente, & detergente vi pollent. Dum sputa minui incipiunt, neque ulla pectoris gravitas, & oppressio metum facit retineri sputa excernenda, remedia adhibentur ex Myrrha, Olibano, Sarcocolla. Opoponace &c. cum Terebinthina, Balsamo Peruviano, similibus.

Satis

(a) *Monit. & Præcept. Medic. dic. scilicet. 10. p. 41.* (b) §. 858.

Satis superque Summorum Præceptorum Auctoritate ,  
 meam curandi methodum hætenus comprobasse videor ;  
 verum negligenda non est clarissimi Tissot morbi hujus  
 therapeja , quam ideo proferre libet , tum quod simpli-  
 cissima , tuoquæ captui accommodata sit , tum quod su-  
 perioribus ex parte congruat ; hanc (a) gallico sermone  
 sic exponit . Primo l' on prend de quatre en quatre heures  
 un peu de crème d'Orge , ou de riz . Secundo si la matie-  
 re paroît épaisse , gluante qu'elle ait de la peine à se dé-  
 tacher , il faut donner de deux , en deux heures une cuil-  
 liérée de la potion composée d' une Once d'Oximel scil-  
 litique , & d'une forte infusion de sureau , & boire entre  
 deux de demi-hure , en demi heure une tasse de boisson  
 faite avec l' infusion de fleurs de sureau , & d'hysope .  
 Tertio quand la matiere n' a pas besoin de ces rémedes  
 pour être évacuée , on ne les emploie pas , mais on con-  
 traire la même norriture qu' on mêle avec parties égales de  
 lait , ou a la quelle , ce qui est boucoups plus efficace ,  
 on substitue la même quantité de lait fraîchement tiré  
 d'une bonne Vache , qui dans ce cas fait la seule norriture  
 du malade . Quarto on donne quatre fois par jour de deux  
 en deux heures , en commençant de bon matin , une prise  
 de meilleur kina en poudre à la dose d'une dragme délayée  
 dans un peu d'eau , ou reduite en bol avec un peu de Si-  
 rop , ou de miel : La boisson ordinaire , est un lait d'Aman-  
 des , ou une tisanne d'orge , ou de l'eau avec un quart de  
 lait . Quinto il faut se promener tous les jours à Cheval ,  
 en Voiture , en Char , suivant que les forces , & les cir-  
 constances le permettent . Balsamica cujuscumque gene-  
 ris (b) condemnat , quod obstructions canaliculorum pul-  
 monalium gignant , difficile digerantur , calorem & opres-  
 sionem ingerant . Verum jam laudatus Anonimus Auctor  
 ibidem objectiones omnes his verbis optime diluit . Les  
 beau-

(a) Tom. I. Chap. 4. §. 74. (b) §. 38.  
 pag. 118.

39  
 beaumes naturelles ne conviennent point aux phthisiques qui ont beaucoup de fièvre, qui sont sujets aux inflammations, & aux hémorragies, qui sont d'un tempérament sanguin, ou bilieux, & facile à irriter, qui crachent aisément, qui sont déjà desséchées par la maladie; Mais ceux qui sont d'un tempérament froid, cachetique, pituiteux, & glaireux, qui crachent difficilement, qui ne sont point sujets aux inflammations, mais qui le sont aux engorgement des glandes, dont le tissu du poulmon est relâché qui sont plus oppressés par l'abondance des crachats retenus, que par la destruction d'une partie de la substance des poulmons, en qui les urines coulent trop lentement, qui ne sont point encore dans la fièvre lente, ou qui ne l'ont pas forte, ceux-là paroissent devior en faire usage.

§. 28.

Memoratorum præsidiorum vim non parum a potioribus calidis, & tepentibus adaugeri sciens, toto primi, & secundi morbi decursu, sive decoctum Hordei, & Avenæ, sive Emulsionem, sive aquam succo acido limonum, ut Benneto placuit, leviter saturatam, semper magis, minusve calidam, in ratione status ejusdem, præscribebam: memoria enim non exciderat, quod de simplici aqua ex Rufo Ætius (a) jamdudum nobis docuerat; illam, nempe, calidam convenire ubi excretionem præparare, & ubi quid attenare, & ubi diffundere, aut liquefacere, aut mollire, aut eluere, aut concoquere aut discutere volumus .... particulatim vero mucum ducere, & scœratum adjuvare, & dolorem omnem mitigare, & præsertim in præcordiis, ac intestinis; tepidam vero his qui ulcera habent circa septum transversum, & sanguinem spuentibus, & rupturis in succingente costas membrana, convenire.

§. 29.

Therapeja morbi per plures dies juxta memoratos artis

(a) *Tetrab. 1. sermo. 3. cap. 165.*

artis Magistros hoc modo instituta, inutilis illa albi, lenti, salivalis, spumosi, & subrotundi sputi creatio, sic ab Hipp: (a) nominata, mutari, illiusque concoctio perfectior, excreatio copiosior, facilior magno ægri commodo fieri, ignisque febrilis, & sitis extingui, verbo, signa omnia felicitis exitus §. 17. descripta paulatim manifestari ceperunt. Distinctissimam concoctionis sputorum in suppuratis ideam duobus potissimum in locis dedit nobis Hipp. (b): Charitis historiam describens, ait: Postquam vero erat tussis, expectoratio perseverabat semper multa facilis primum, lenta, alba, crassa; postquam vero concocta erat similis purulentis: Agens vero de Ration: Victus in Morb: Acut: (c); Cocta autem, inquit, sunt sputa quidem cum sunt similia puri; Lib: autem Prædict: (d) & Progn: (e) Suppuratorum sputum album, leve, & æquale, optimum esse scribit, ea ratione quæ bonum etiam, eodem Progn: lib: (f) dixit flavum sputo exacte permixtum, quod humoris morbifici evacuationem, & inchoatam coctionem victrice natura, cujus proprium munus est concoctio, & permixtio, satis clare demonstrat.

## §. 30.

Verum, licet maximum morbificæ materiæ concoctio solutionis morbi sit indicium, perfectum tamen non est futuræ salutis argumentum: Necessè est enim ut subacta materies per vias naturæ accommodatas facile, ut fieri potest educatur; sic in suppuratis stagnans & corruptus humor facile per anachatarin educi debet ut æger a phthisi servetur: quod si nullo pacto collectum ibi pus rejiciatur, quod debilibus accidit, suffocati aut tabidi moriuntur: Hinc ait Hipp: (g) seniores potius quam juvenes interire, quoniam,

- |                             |                               |
|-----------------------------|-------------------------------|
| (a) Lib. Progn. sec. 2.     | (e) Sect. 2. cap. 11. n. 280. |
| cap. 9. n. 155.             | & cap. 12. n. 345.            |
| (b) Lib. 7. Epidem.         | (f) Sect. 2. n. 155.          |
| (c) N. 46.                  | (g) Progn. sect. 2. cap. 11.  |
| (d) Lib. 2. cap. 6. n. 330. | n. 340.                       |



jam, inquit Gal. (a) imbecilles vires habent, & ut hi liberentur magna vis requiritur quæ per tussim, ac sputa expurgat, quum hi, qui servari debent plurimum puris tussi purgare debeant, unde finimus Hipp. (b) Quicumque ex morbo laterali suppurati sunt, si 40. diebus purgentur a die qua fit ruptio, liberantur. Re enim vera tanta fuit purulentæ excretionis copia, ut suppuratorum expuitione heminarum 10., & 13. puris servatorum, observationem apud Galen: (c) sine admiratione deinde legerim, quum ad 20. circiter libras spatio temporis ab Hipp. supra statuto ægri mei excreationis summa pervenerit.

### §. 31.

Quæ de sputorum concoctione, eorundemque screatu in purulentis ex Hippocraticis Codicibus fausto ægrotantis omine vera deprehendi, iisdem in locis aliorum signorum respectu, alvum nempe tum exigua, tum compacta pro ratione ingestorum dejicere, album, leve, & æquale sedimentum urinas habere, dolorem, & pondus lateris, sitimque minui appetitum, & somnum redire, corpus æqualiter calefcere, & molle esse, facile spiritum ducere, morbumque ferre, verbo omnia quæ naturalis æconomix functiones restitutas indicant, ea ipsa æque certa perfectæ salutis indicia notavi: hinc pulmonalis ulceris exsiccatio secuta est, omnisque phuleos timor evasit, sola pulmones consolidandi, & roborandi, corpusque univertium reficiendi, indicatio remansit, huic pharmaceuticis, & diætericis auxiliis §. 22. memoratis, ex parte satisfeceram, curationis reliquum cibo, motui, & aeri rusticano deinceps commisi.

### §. 32.

Postremam hanc medicinæ practicæ partem Latino-  
rum Medicorum Cicero Celiûs (d) ubi de Tabe, ejusque

F

Ipe-

(a) *Comm. 2. tex. 69.*

*cap. 3. p. 30. lit. H.*

(b) *Aph. 15. sect. 5.*

(d) *Lib. 3. de Med. cap. 22.*

(c) *Lib. 5. de luc. affect.*

speciebus verba facit elegantissimo sermone descripsit. Quod si febris, inquit, aut nondum incursat, aut jam remissit decurrendum est ad modicas exercitationes, maximeque ambulationes, item lenes frictiones .... cibus esse debet ... Intubus, Ocimum, Lactuca, deinde lenis forbitio ex Ptisana, vel Alica, vel ex Amylo lacte adjecto: Oriza quoque & si nil aliud adest Far idem præstat: tum invicem modo his cibus, modo illis utendum est, adjiciendaque quædam ex media materia, præcipue vero ex prima, cerebellum, vel pisciculus, & his similia: sed, ut paulo ante monuerat, paulatim, ne, si corpus insuetum subita multitudine oneraverit, stomachus gravetur, & coctionem impediat ... Ab exiguo cibo incipere debet æger, quotidie adjicere, donec ad juitum modum perveniat ... Cibi vero esse debent ex his, qui facile coquuntur, maximeque alunt. Ergo vini quoque sed aulteri necessarius est usus. Bennetus (a) alimentorum species huic valetudinis tempori accommodatas recensens, eas, præter illas supra memoratas, ex carnibus Vituli lactantis, Vervæcis, Agni, Hædi, Gallinæ, & pullorum Caponis, Turdi, Merullæ, Alaudæ, Vanellæ, Ardeæ depromit; E Piscibus vero Lucium, Truttam, Percam, similia commendat. Regulas vero corporis motui adaptatas (b) præscribens: exercitia omnia, inquit, sint læviora, & quæ partes inferiores, maxime subagitando moveant; motus autem omnes vehementiores eo tempore partium præsertim superiorum tamquam reos merito damnamus: unde Hipp: (c) vociferationem, & iracundiam, ne morbus revertatur, sedulo vitandam esse præcepit.

### §. 33.

Præcepta hæc omnia paucis, ut solet, complexus est Batavorum Hippocrates (d) Oportet; inquit in corpus

(a) *Lib. citat. p. 142.*

*sub n. 1.*

(b) *P. 127.*

(d) §. 1208. n. 3.

(c) *Lib. de inter. affectio.*

43  
 pus hujusmodi ingerere, quæ minimam requirunt vim, ut  
 per pulmones fluere, ibique subigi queant, tamen nutri-  
 ri apta, & puris refectioni inepta. Præsidia huic indica-  
 tioni accommodata & ab eximio ejus Commentatore enu-  
 merata, §. 26. jam supra sunt indicata: unum ex Hipp:  
 de locis in Homine (a) ciborum quantitatem respiciens  
 præceptum a Swietenio sub eodem §. relatum, adjicien-  
 dum est; tabidis nempe cibaria non multa exhibenda simul  
 esse, neque plura quam cibaria frumentacea, & vino di-  
 luto inter cibos utendum ne calefaciat, & in corpore de-  
 bili calorem exhibeat, & utraque simul eodem tempore  
 calefaciant, & calore multam fluxionem inducant; unde  
 consequitur tantum alimenti concedendum esse, quantum  
 a naturæ viribus subigi commode possit: Si autem sic di-  
 vidatur nutrimenti assumendi copia, & pluries in die,  
 aliquid ingeratur; illud facillime assimilabitur, & hu-  
 mores qui læsam partem abluunt; habebunt ferme sem-  
 per easdem proprietates.

### §. 34.

Auxiliis omnibus internis a Therapeutica petitis,  
 juxta summorum in arte Virorum sic exploratis, atque pro-  
 batis, videndum denique superest quid motus, & cælum  
 ad sanitatis perfectionem ex eorum praxi valeant. Tanta  
 est horum præsidiorum ad hujusce generis morbos integre  
 profligandos vis, & potestas, ut excellentissimus Sydhe-  
 nam, se in medicina parem candide ut solet, (b) non  
 invenisse his verbis affirmavit. Neque magis Hyppocon-  
 driacis prodest hoc exercitii genus (loquitur de equitatio-  
 ne) quam Tabidis, Phtisicisque, quorum nonnulli mihi  
 sanguine juncti multum terrarum equo vectore peragran-  
 tes, ex meo consilio sanitati sunt restituti; cum certo  
 sciam, me vel medicamentis quantivis prætii, aut alia  
 F 2 meth-

(a) N. 8.

Guilielmum Cole p. 39.

(b) In Dissertat. Epist. ad

methedo, quæcumque demum ea fuerit, nihil magis iisdem proficere potuisse, quam si multis verbis hortatus fueram ut recte valerent; Neque in levioribus tantum malis, crebra tussi, & macie stipatis id remedium obtinuit, sed, & in tabe tantum non deplorata... Verbo dicam, quantumcumque exitialis Phtisis, & sit, & audiat, utpote qua intereunt duo fere trientes eorum, quos morbi Chronici jugulant, hoc tamen sancte assero, quod neque Mercurius in Lue Venerea, neque cortex Peruvianus in Intermittentibus efficaciores extent, quam in Phtisi curanda exercitium modo laudatum. In omni tabe, subdit, Archiater maximus Richardus Mead (a) exercitationibus, & frictionibus pro virium ratione constanter uti oportet... equo autem vehi dum imbecillitas id non prohibet, vel saltem curru, lectica, aut alio modo corpus movere numquam non expedit.

### §. 35.

Si autem simplex gymnasticum exercitium quocumque in aere factum (modo suapte natura noxius non sit) tantæ in hoc morbo utilitatis est, maxima sane ex eo in aere rusticano expectanda erit. Quum enim ex tellure præfertim a delapsa pluvia gratum odorem, qua loca rustica incolentes recreantur, experimento exhalare celebris ille Physicus Reaumurius (b) demonstraverit, concludendum est illa telluris effluvia per aera volitantia, si bona fuerint, aeris salubritatem in morbis pectoris summe necessariam producere debere. Miram terræ adversus phtisin proprietatem, se pluries in Hispania expertum fuisse refert summus ille Franciscus Solanus clinica pulsuum satis clarus. Testatur enim (c) se balneo terræ in hoc morbo curando feliciter usum fuisse, & inter plures alios phtisicos,

(a) *Memorat. loco p. 42.*

(c) *Origen morboſo capit. 5.*

(b) *Academ. des ſcienc. pag. 174.*

cos, conclamatam Hædicam restituisse integre ter balneo terræ adhibito: Licet autem terram, in quam ægri ad caput usque nudi sepeliebantur morbosa miasmata in se absorbere putaret, eam effluviis spargendis aptissimam cum nudam corporis superficiem undique contangeret, utilem fragrantiam exhalando agris illis prodesse potuisse, Reumuriana observatione merito putandum est. Jure ergo exercitium quodcumque in aere præsertim rusticano, communi Practicorum consensu, summum adversus hos morbos remedium censendum est. Num denique effluvia Animalium stabulis inerrantia ad morborum hujusmodi curationem conferre aliquid possunt? Acta literaria publica docent.

### §. 36.

Hæc est morbi illius descriptio, cujus naturam me non intelligere, & cæco modo curare ~~quædam~~ dictitabas; aliter tamen sensit Publicus Medicinæ Lector, & Professor Georgius Bonelli, qui pluries meum ægrum invisit, & optimus Praxeos cultor Pajva, qui ab una mea curandi methodo sibi ab aditantibus relata, morbi genium, & dogmaticam curationem plane intellexit: ipsi oculati sunt testes, & simul æqui judices, num ista morbi historia ingenij Medicaltri licentiæ, & imaginationi debeatur, an vero a fida ipsius observatione ingenue deducta sit, hujusque curatio indicationibus in ipsa relatis ex omni parte respondet.

### §. 37.

Theoriam denique morbi libenter dedissem, ni dogmata practica sub initio proponere tantum statuissem, eamque a Celeberrimo Archiatro Swietenio, meoque summo Bellini te commode haurire posse putassem; satius propterea duxi te ad Hippocratem, ejusque Sectatores vocare, ut illam, quam primo commendavi doctrinam, puro ex fonte desumeres. Tenes ergo juxta Boerhaa-  
vc

ve (a) morbi valde periculosi diligentissimam historiam, dogmaticam medendi rationem: Utinam Medici omnes sic tecum agerent! jam totidem aliorum morborum adeo necessariae descriptiones, & Hippocraticam curandi methodum haberes: His ego Romanorum utilitati pro virili, re nata, studere capi, nec, ubi res postulet, ulterius desinam, modo, \*ut spero, meos hosce conatus libenter excipias. Vale.

Romæ Idib. Sextil.

(a) §. 847.

F I N I S.

